

**REGIONAL NEWS BULLETIN**  
**HEADLINES (EVENING)**

**Date – 14/09/2024**

**Time - 18:30 Hrs**

1. Animal Husbandry & Veterinary Department chhinchhiah danin, kumin January thla atanga vawiin thleng khan vawk pul hri (African Swine Fever) vangin Mizoramah vawk 12,510 an thi tawh.
2. National Legal Services Authority-in ram puma National Lok Adalat buatsaih tura a tih angin vawiin khan Lunglei leh Serchhipah buatsaih a ni.
3. Union Home Minister Amit Shah chuan Hindi tawng chuan ram inpumkhatnaah dinhmun pawimawh tak a luah a ti
4. Prime Minister leh BJP hruaitu senior Narendra Modia chuan Jammu and Kashmir-in hmasawnna kawngah chanchin thar an ziak mek a ti.

<><><>

**ASF**

Animal Husbandry & Veterinary Department chhinchhiah danin, kumin January thla atanga vawiin thleng khan vawk pul hri (African Swine Fever) vangin Mizoramah vawk 12,510 an thi tawh.

Vawk pul hri hian khaw hrang hrang 236 nghawng tawhin ASF vanga vawk suat hi kumin chhungin 21,561 an tling tawh a, tun hnaiah hrileng hian ziaawm lam a pan ve hret hret nia hriat a ni.

Sorkar chuan vawk pul hri leng hi a buaipui zel a, tun hnai khan AH & Vety Minister Pu C. Lalsawivunga chuan sorkar laipui hnenah, ASF damdawi rang taka siam emaw, ram dang atanga a lakluh dan kawng emaw dap turin a lo ngen tawh a ni.

Sorkar laipua Ministry of Animal Husbandry & Dairying-in Odisha-ah AH&Vety Mnister-te intawhkhawmna Monsoon Meet a buatsaihah Minister Pu C. Lalsawivunga pawh telin ASF-in Mizoram a tuam avanga a tawrh nasatzia te, ran vulhtute chhawmdawl an ngaih thu te sawiin sorkar laipui chu hma lak sak turin a ngen a. Hri leng awm thar tur ven leh hriselna kawnga India sorkar in chak taka hma a laknaah Mizoram sorkar pawhin theihtawp a chhuah mek thu leh a chhuah zel tur thu a sawi bawk a ni.

<><><>

**SWACHHATA HI SEVA 2024 CAMPAIGN AT MAMIT**

Mamit Bawrhsap Pu Jacob Lalawmpuia chuan India ram pumpui faina beihpui thlakna campaign Swachhata Hi Seva 2024 chungchanga Mamit district mipuite ngenna vawiin khan a tichhuak.

Bawrhsap chuan faina chu changkanna atana kailawn pawimawh tak a nih avangin mitinin an tih theih leh an mawhpurhna a nih angin mimal, chhungku, veng leh khawtinte theihtawp chhuaha hma la turin a sawm a. Bawlhhlawhte a paihna tur lo a paihin ram leilung thlengin nghawng pawi tak a nei thei a tih sawiin bawlhhlawh pahi turah tawih thei leh thei lo thliar fel a pawimawh hle a ni a ti a. Hapta hman chhung hian Department tinte leh khawtlang hruaitute pawhin uluk lehzual a mipuite zirtir leh kawhhmu a tul a ni a ti a. Campaign hlawhtling taka kalpui a nih theih nan neitu thinlung pu a thawhho puiah District mipuite a sawm a ni.

Thuchhuaha tarlan danin he faina campaign kalpui tur atan hian Nodal Officer pahnih Urban-ah PHE Senior EE Pi Helen Saibuangpui leh Rural-ah Mamit DUDO Pi Mary L. Rodinpui te ruat an ni a. State Sawrkarin ruahmanna a siam tawh angin tun thla ni 17 atanga thla thar ni 2 chhunga campaign hi kalpui tur a ni a. Hemi hun chhung hian Department hotute, Sub-Division, Block leh Village Council tin te'n an huamchhung theuhah uar zawka kalpui tura ngen an ni.

<><><>

**PWD MINISTER**

Public Works Department (PWD) changtu Minister Pu Vanlahlana chuan Aizawl khawpui chhung leh pawn kawng chhia te chu ruahui tlak loh hunah siamthat hna thawh a ni dawn a, kawng chhe siamna tur chu sorkar in pawisa a nei a ti.

Minister chuan Mizoram hmun hrang hranga kawngpui chhia te chu siam duh mah se, ruahui a tlâk reng avangin siam mai theih a nih loh thu a sawi a. Ruahui a tlak loh hunah kawng siam hna an tan dawn a ti a. Sorkar chuan pawisa ngah viau lo mah se,

kawng chhe zual lai siam hatna | tur pawisa chu an nei tih sawiin, kawng chhe siam that hlan an nghakhlel hle tih a sawi bawk.

Ruahtui la tuihul chiah lo mah se Aizawl khawpui chhung kawng chhe zual lai siam mek a nih thu sawiin PWD Minister chuan, tunlai hian kawng khuar chhe zual laite boulder hmanga hnawh a ni a, a tahtawla siam chhoh mek a ni, a ti a. Hetih lai hian Alkatra nena kawng siam chu an la ngam rih lo a, Alkatra nena kawng an siam hnu lawkah ruah a rawn sūr leh thin a, an kawng siamte a chhe leh nghal mai zel, a ti a. Tun ang khuaa alkatra nena kawng siam chu sum khawhralna mai a nih avangin an duh rih loh thu a sawi a ni.

Minister chuan Cyclone Remal avangin kuminah kawng a chhe nasa hle a ni a ti a. Mizoram chhungah PWD enkawl loh kawng tam tak a awm thu sawiin, NHIDCL leh BRTF-in an enkawl mek eng emaw zat a awm a ti a. Chutihreal erawh chuan Mizoram chhung a nih avangin a that theihna atan theiawp an chhuah tih sawiin, NHIDCL leh BRTF hotute an nawr reng thu a sawi bawk a ni.

<><><>

### NATIONAL LOK ADALAT AT LUNGLEI

National Legal Services Authority-in ram puma National Lok Adalat buatsaih tura a tih angin vawiin khan Lunglei leh Serchhipah buatsaih a ni.

Lunglei District Legal Services Authority chuan District Court Building Lungleiah National Lok Adalat hi a buatsaih a. Lunglei District huam chhunga court la thlenpui loh thubuai hrang hrang bakah, mimal thubuai chi hrang hrang 118 ngaihtuah a ni a. Thubuai ngaihtuah tur hian Bench pahnih buatsaih niin Lunglei Chief Judicial Magistrate, District Legal Services Authority Secretary ni bawk Pi Lalthansiami Hnamte leh Judicial Magistrate First Class Pu Lalbiakmuana'n ten an kaihruai a. Thubuai hrang hrang thehluh atangin thubuai 60 tihfel a ni a. Vawiina thubuai ngaihtuah hian leiba in thinn |na a tam ber a, chanchin buatsaih lai hian cheng nuai 64, sing 9 sang 3,304 hu chin fel a ni.

Vawiin vek khan Serchhip District Legal Services Authority chuan District Court, Serchhip ah National Lok Adalat an buatsaih a, cheng nuai 57 sing 4 201 hu thubuai chinfel a ni.

Serchhipa National Lok Adalat hi Pu R. Malsawmdawngzuala, MJS leh Pi Zosangzeli Tlau, MJS ten bench pahnihah an kaihruai a. Serchhip district chhung atanga thubuai chi hrang hrang 64 lut zinga thubuai 28 chinfel a ni.

<><><>

### BAILEY BRIDGE COLLAPSED

Mizoram leh Assam inkalpawhna pakhat Saipha – Bagha road a awm, Bailey bridge chu nizan khan truck in an zawh chhim.

Lei chimna hmun hi Mizoram atanga Bagha bazar thlen hma, Assam lam huam chhunga awm a ni a. Nizan khan truck pahnih in leidawh hi a ruala zawhin hei hian a chimpui ta ni a thu dawn a ni.

Leidawh hi Serkhan – Bagha road atanga Assam leh Mizoram inkalpawhna pawimawh tak niin, lirthei veivak bakah motor lian in an zawh ber thin a ni.

<><><>

### HOLIDAY ANNOUNCED BY GAD

Mizoram sorkar hnuai General Administration department (GAD) chuan vawiin khan thuchhuah siamin tun thla ni 24-a Village Council By-Election neihna tura vote thlak turah khaw 14 tan chawlh a puang.

GAD chuan voter ten vote an thlak theih nan chawlh chu puan a nih thu sawiin chawlh puanna khua te hi Aizawl District-a Sihphir Venghlun, Lunglei District-a Bunghmun West, Serchhip District-a Serchhip-III (Chhim Veng) leh New Serchhip North, Champhai District-a Khuangthing, Leisenzo, New Champhai leh Ngur, Mamit District-a Dampa Rengpui-I, Kolasib District-a Kolasib Saidan leh Nisapui, Khawzawl District-a Chawngtlai leh Khawzawl Dinhar bakah Hnahthial District-a Hnahthial South-II te a ni a. Heng khuaa sorkar hnathawkte, zirna in leh bank a thawkte tan chawlh hi puan a ni.

<><><>

### ADVISER TO CHIEF MINISTER

Adviser to Chief Minister Dr. Lorrain Lalpekliana Chinzah, Lawngtlai East Bialtu MLA ni bawk chuan sawrkari ai kal titawp turin theih tawp a chhuah mek a ni a ti.

Nimina District Project Office, Samagra Shiksha, Lawngtlai a tlawnah Dr. Lorrain Lalpekliana Chinzah chuan he thu hi sawiin aikal titawp tura sorkar hmalakna chuan ram leh hnam tana nghawng tha zawk a thlen ngei a beisei thu a sawi a.

Rinawmna a pawimawh tih sawiin eng hna pawh rinawm taka thawh a nih chuan malsawmna a keng tel thin a ti.

Lawngtlai East bialtu MLA chuan District Project Office, Samagra Shiksha, Lawngtlai thawktute chu rinawmna leh taihmakna nena an hna thawk thin turin a fuih a. Lehkha thiam zawng tehn, literacy rate-ah Lawngtlai district- a hnufual thin hle chu veiawm a tih thu tarlangin zirthiamna kawnga theihtawp lo chhuah chhunzawm zel tur leh a tul anga hma la thin turin District Project Coordinator leh a thawhpuite a sawm nghal a ni.

Adviser to Chief Minister Dr. Lorrain Lalpeklana Chinzah hian Government Southern Standard Middle School leh Government College Veng High School, Lawngtlai a tlawh nghal bawk a ni.

<><><>

## YLA

Lawngtlai Bethel Veng Branch YLA te chuan Young Lai Association Golden Jubilee lawmna pualin khawsak harsa te in an sak sak.

Young Lai Association Golden Jubilee lawmna pual hian Bethel Veng Branch YLA te chuan khawtlang huap hnatlang an ko a. An veng chhunga khawsak harsa, mahni in sa theilo engemawzat in sak sakin, mi 100 bawr hnatlang ah hian an thawk chhuak a ni.

Young Lai Association Golden Jubilee hi kumin kumtir atang khan intihsiaikna hrang hrang hmangin lawm chhoh a ni a. Vantlang tana thil tha tih nan Golden Jubilee lawmna hi kalpui mek niin a laawmna pui ber chu November ni 19 atanga ni 21 ah neih tum a ni.

<><><>

## HINDI DIWAS

Union Home Minister Amit Shah chuan Hindi tawng chuan ram inpumkhatnaah dinhmun pawimawh tak a luah a ti. Vawiina New Delhi-a Official Language Diamond Jubilee lawmna leh Akhil Bharatiya Rajbhasha Sammelan vawi linaah he thu hi sawiin Pu Shah chuan Hindi leh tawng dang inkarах inerna a awm lo a, an intifamkim zawk a ni a ti.

Union Home Minister chuan ram chak tak din tur chuan tawng lamah ingahna nget tha tak neih a ngai a ti a. National Education Policy chuan hei hi ngai pawimawhin zirlaiten anmahni pianpui tawng ngeia zirna an dawn chu a ngai pawimawh hle a ni a ti bawk.

Vawiin Hindi Diwas ah hian Union Home Ministry-a Depart of Official Language chuan official Language-a Hindi pawm anih kum 75 na pualin conference a buatsaih a. Pu Shah hian Rajbhasha Bharti magazine a bika siam leh Rajbhasha Gaurav leh Rajbhasha Kirti Award te a sem bawk a ni.

<><><>

## ASSEMBLY ELECTIONEERING

Prime Minister leh BJP hruaitu senior Narendra Modia chuan Jammu and Kashmir-in hmasawnna kawngah chanchin thar an ziak mek a ti. Vawiina J&K Assembly inthlan campaign Doda-a neihah he thu hi sawiin Pu Modia chuan eptu party te chu chhungkhat leh lamhnai induhsakah a puh a. Jammu and Kashmir hmasawn chak zia sawilangin vawiinah chuan bung thar an chuangkai mek a ni a ti.

Jammu & Kashmir Assembly inthlan campaign hi ngawrh takin kalpui mek a ni a. Inthlan thawhkhataah hian Assembly bial 24-ah tun thla ni 18 hian vote thlak a ni ang.

Hetihlai hian Haryana-ah pawh Assembly inthlan atan political party te an campaign tan a. Thlaleh October ni 5 hian Haryana Assembly seat 90 ah vote thlak a ni dawn a. Prime Minister leh BJP hruaitu senior Narendra Modia chuan vawiin khan Haryana Assembly inthlana an party campaign a hawng a ni. Jammua & Kashmir leh Haryana inthlan result te hi thlaleh ni 8 ah chhiar a ni ang.

<><><>

## TYPHOON YAGI

Kumina Asia-a thlipui thawk na ber Typhoon Yagi chuan kar hmasa chhung khan China chhim lam leh Asia chhimchhakah te chhiatna tam tak a thlen. Vietnam ah chuan Typhoon Yagi avanga chhiatna thlengah mi 254 an thi a. Chhanchhuah hna thawktuten leimin leh tuilenna hmunah te ruang zawn hna an thawk chhunzawm zel a, mitthi zat pawh hi a la pun chhoh rin a ni a. Red River tui lianin Hanoi khawpui a chim chuan kam lam a pan hret hret a. Khawpui chhehvel erawh tuiin a la chim nasa hle a ni.

Typhoon Yagi Thailand hmarlamahte, Laos leh Myanmar hmarchhak lamahte a siper an dawng ve a. Thailand-ah hian mi 10 tuilian leh leimin avangin an thi a. Myanmar ah hian nimin thleng khan mi 33 in an thihphah tawh niin sipaiten an sawi.

<><><>